

Wil immer mit dem Schwerdt daran/  
Wil hawen/ stechen jederman.

Hat Kron vnd Scepter in gewalt/  
Vom Scepter doch die Kron empfalt/  
Denn an ein Seuffer Maiestat/  
Obrigkeit/ Ampt/ vnd Magistrat/  
Gar vbl bestellt sind vnd verwahrt/  
Zu schandt werden sie zu jeder fahrt/  
Ein Trunckenboltz acht keiner ehr/  
Kein grautet weis zu halten er/  
Verleurt sein ansehen vberall/  
Sein reputation allzumal/  
Denn Weisheit wil beim trunck nicht sein/  
Wie denn solchs gibt der augenschein.

Dis Kindes Tasch auch löcherig ist/  
Daraus felt geldt zu jeder frist/  
Steht auch offen wol für vnd für/  
Wie eines Fürsten Kuchenthür/  
Keins geldes wird hie nicht geacht/  
Man gibt heraus/ on all betracht/  
Dieweil die Tasch ein Pfennig hat/  
So mus es gehen früh vnd spat/  
Das helt denn mechtig vbel haus/  
Wenn man so immer gibt heraus/  
Das geldt verleurt sich vnter der handt/  
Bis das man kein Pfennig mehr fandt/  
Der mag wol sein ein guter gsell/  
Das er sein geldt also versell/  
Aber ein böß Kinder Vater ist/  
Ein solcher zapff/zu jeder frist/  
Darumb er bloß vnd nackent geht/  
Vnd freß oft gern/wenn er es het/  
Denn betteln folgt in dem process/  
Das man des sauffens dann vergesse.

Es